

江西詩徵

江西詩徵卷四十六

南城曾煥賓谷編輯

明

鄒緝

緝字仲熙吉水人洪武中舉明經建文時入爲國
子助教永樂初擢翰林侍講左庶子三殿災應詔
上疏累千餘言切直中竅居官勤慎清操如寒士
有素庵集

翰林院齋宿聽琴詩

并序

永樂三年春正月丁未上將祀南郊誓戒羣臣致
齋三日百官旣受誓各就宿別館於是侍讀曾公

日章修撰錢公仲益徐公孟昭檢討蘇公伯厚沈
公民則暨無錫王公孟端與予凡七人皆會宿於
翰林之公署於時天宇澄霽月色清朗諸君子相
與秉燭坐於公署之東偏沈公善琴因請鼓之作
商調數引舒徐安適淳古澹泊有三代之遺音坐
者聽之莫不心暢神怡乃相與分韻賦詩以紀其
事且要孟端爲之圖云

禁直夜迢遞齋居澹無爲同心聿來集良友俱在茲懽言
適嘉會秉燭坐彈碁華月照虛牖微風動綺帷上客發幽
興援琴揮素絲一彈孤鶴舞再鼓心神怡清商旣激烈雅
調亦舒遲秋鴻唳遠空猗蘭芳葳蕤俯仰極餘韻邈與高

山期無賞亦云洽，傾耳遂忘疲。沉吟永夕，逍遙起遐思。
仰觀庭戶間，爛然明星垂。旭景不知曙，永言歌此辭。

行路難

請君勿言苦，我歌行路難。世事有反覆，人心若波瀾。布衣
扼奪卿相位，禍讐起自杯酒間。君不見昔時山東一匹夫，
讀書往往輕凡愚。談笑強干唐，舉相擢鞭西入咸陽都。一
言啖秦王，再言扼范雎。黃金束帶高堂居，風雲變態生須臾。
與君不見魏其都，位漢公卿灌夫意氣排漢廷。武安本在
門下列，拜伏跪起呼父兄。一朝寵據津要地，舊時意態寧
復生。寶嬰旣失勢，潁水亦不清。狂呼罵坐何足驚，咸陽市
上殊無情。人生自古有如此，何須局促增歎聲。

和梁先生病中示子詩

有序

西昌畦樂先生梁君不移隱居田里養高樂道日以詩酒自娛其詩冲澹閑雅常有自得之趣予每得而愛之去年秋其子翰林修撰兼春坊贊善用之與予同赴召來北京先生既念其去之益遠而不能忘於懷也因形諸歌詠賦詩二首且書以寄示用之用以先生之不忘于懷而欲有以慰先生之思也俾予使屬和予以先生父子相念之意得天倫之真而其間文辭學術之懿又非他人所能及足爲人所羨慕者故不揆辭之鄙輒偕和於後庶幾先生得而讀之知其子之思念其親者亦

不異於先生云

詩律年來擬建安雅懷應羨海天寬
夔頭秫酒從朝醉籬下秋英每夕餐
迢遞江南煙月晚蒼茫薊北暮雲寒
誰知卧病依田里猶有新詩寄遠看

卽事

月上碧天高夜涼清露重獨起推篷望
風生碧波動兩岸蘆聲急一川烟景微
忽聞棹歌響驚起白鷗飛叢叢舴艋
黃湫湫江波白靜夜不成眠起坐看明月

歎楊花

輕盈不自持歷亂隨風起朝逐上林飛
暮落東流水素質徒可憐貞心不自擬
感此懷益深嘆息殊未已

白楊河

白楊河下春水碧白楊河邊多估客東風二月柳條新却
念行人千里隔岸上居人纔數家茅茨深處見桃花小婦
河邊汲新水老翁門外看雛鴉桑苗未青麥苗綠牛羊散
落村墟牧行客年年任往來居人自住楊河曲

河邊柳

河邊柳昔人曾種今還有千絲萬縷播春風年年攀折行
人手行人朝暮相經過新條無奈別離何柔情不減舊時
意舞態誰憐幽思多北來南去知多久青青又見河邊柳
不見迎新送故情空使行人但回首

送王道子周起巴遊學

新策明時不見收，獨攜書劍別神州。
且將化雨分湘郢，應見文星近斗牛。
泛渚定過雲夢澤，題詩須上岳陽樓。
秋風遙思登臨處，却望京華憶舊遊。

九日登欽天臺

高臺百尺出城頭，佳節登臨散客愁。
六代江山餘勝跡，一天雲物自清秋。
石頭厓斷西風緊，鍾阜雲寒落木稠。
鐘磬乍聞時已暮，一盃難盡強相酬。

周啟

啟字孟啟，貴溪人。少學古文，稱於時。
洪武中以文學薦授太常寺贊禮郎，遷後軍都督府經歷，有詠菜稿。

中都龍興寺伏讀御碑

九重宸翰麗天文三字穹碑壓厚坤
山色不知今古異地靈惟戴帝王尊
蛟龍絕獻盤亭構獅象諸天拱寺門
千載鍾王誇健筆敢同羲畫與時論

李仲訓

仲訓號峴山南昌人洪武中官襄陽教授歷吏科
給事中有詩文鳴於時爲江南十才子之一

西臯詞

酒熟黃鸝肥後月圓丹桂香時誰道先生無事半醒半醉

題詩

陸希靜

希靜金谿人洪武中舉賢良方正官永明主簿

雷峯霧泉觀

路自仙臺出碧蘿亂峯迢遞晚經過元猿嘯樹日欲沒白
鶴上雲晴更多水落蓮池空瀲灩山遺劍石亦坡陀欲尋
五老看棋局又恐歸時爛斧柯

夏霖

霖字道存吉水人洪武中以文學徵爲本郡教授
居官有行誼沒配祀九賢堂有荷亭金灘諸集

題義木園

百年端木倚雲端六月天風作夏寒形跡渺隨塵土化根
株惟向畫圖看諸賢賦咏名俱在奕葉收藏子獨難却恨

無因覩蒼翠臨題撫卷重盤桓

王叔舟

叔舟浮梁人洪武中以獻雪詩授徽州同知

三月三日雪應制

柳絮飛還早梅花落太遲天顏多喜色瑞氣滿瑤池

吳子恒

子恒豐城人寧海縣丞有雪崖詩集

高洲

青山西峙水流東陽谷縈紆一道通老去相知一藜杖
邊扶我最高峯

曾一本

一本南昌人

挽屠指揮

一別驚淪沒空遺大樹陰
愁枯雙淚眼交絕百年心
瘴海連天闊黃茅過嶺深
料應魂未返悵望獨長吟

李克正

克正初名頤後以字行字宗頤豫章人國子監學
正歷助教後爲監察御史以朝瓊州府吏事超授

禮部尙書

送呂君采史北平

八月烏啼海子橋南來使客下青霄
雲埋石室丹書在日落延秋翠輦遙
麟史未全歸聖代龜文猶得認前朝
詞臣

戟筆需文獻莫遣回車久寂寥

呂復

復字仲善章貢人官太常丞常充史局入北平采

史

送鄭仲宗還金華

都門盛冠蓋乃與行者別行者來復還使我心哽咽人留
棹聲遲酒旣驪歌徹綠柳陰正圓相看不忍別

題方壺蒼山秋意圖

昔遊華蓋仙人掌萬壘芙蓉紫翠生猶記月明聞鉄笛人
間無處著秋聲

谷宏

宏新淦人官中書舍人

移明詩苑一作閩人

行經華陰

雲開太華倚三峯積翠遙連渭水東
蓬塞雁聲寒雨外離宮草色暮烟中
秦關日落行人少漢時天陰古戍空
寂寂武皇巡幸處祠前木葉起秋風

登岳陽望洞庭

對酒平臨百尺闌洞庭南望楚天寬
中流雨散君山出故國風高夢澤寒
帆挂夕陽鵬際沒波涵遙月鏡中看
登臨最易輕軒冕惆悵滄浪羨釣竿

黎充輝

充輝字脣之臨江人

山雲辭將歸作

清江兮淙淙上有山兮穹窿白雲兮谷口一碧兮千峰
崢嶸兮絕壁挂偃蹇兮長松朝迎兮秋陽暮卷兮秋風
山之入兮雲從被薜荔兮攀芙蓉來乘雲兮朝九重
踰一鶴兮江東點汀花兮白蘋雨霜葉兮丹楓忽雲歸兮人遠
山蒼蒼兮倚晴空

黎 飛

昶字伯輝清江人

同安謠

黃雲漲空雪欲飄長江落日生暮潮同安城頭獨延佇悲
風拂鬢寒蕭蕭布蓬老翁年七十鶴髮鵝衣道傍立倚筇

爲我說興亡含憤未言先涕泣前朝值亂戍守奔土豪割
據何紛紛攻城拜將爭殺戮同安賴有余將軍將軍秉心
盡忠義訓練民兵久精銳城邊掘濠深百丈城上嚴更戢
旗幟朝廷消息久莫通江襄群盜矜豪雄樓船萬甲氣如
虎戎衣染遍秋江紅將軍此時力匡國執銳開闢屢迎敵
鐵騎交馳白日昏雕戈上指青夭折樅陽門前殺氣高奮
身寧辭征戰勞江淮黎庶半爲鬼僵死卧骨填空濠同安
拒守經七歲破圍不見官軍至銅柱難成馬援功睢陽不
屈張巡志一朝群盜登城闔揚旗百里飛紅塵疲兵裹創
不能戰計窮豈願圖全身將軍挺身出帥幕竟逐飛星陣
前落半夜精靈出戰營千秋廟食依江郭聖人一出寰宇

寧鳳麟應瑞黃河清當年逃亡命如蟻豈期年老逢昇平
荆棘連雲戰爭地近來茅屋方成市山鳥如呼耆舊名江
流尙帶英雄淚當年繁華何足論聞翁此語傷吟魂樓臺
盡隨灰燼滅人物風流今幸存尊前感慨應未已宦情總
付東流水長歌因賦同安謠留與他年入詩史

陳靖遠

靖遠南昌人

姑惡行

芳池月陰春草碧有鳥有鳥鳴不息千聲萬聲道姑惡新
婦低徊淚痕落姑惡姑惡姑不惡努力廳前勤織作嗟爾
小鳥胡不思新婦會有作姑時

董儒

儒字大賓鄱陽人

鳳凰臺

臺上吹簫作鳳聲
鳳凰相應其和鳴
一從仙侶乘雲去
幾聽遺音傍月明
芳草洲前閒宿鷺
烏衣巷口語流鶯
可憐虎踞山邊土
頻築南朝六代城

四明夜泊

孤城臨野戍
短棹倚江橋
客路辭家久
親闈入望遙
斷雲晴後樹
明月夜深潮
感此無窮恨
令人倍寂寥

聶同文

同文臨川人建文元年鄉舉官翰林侍讀後改中

書舍人

退朝口號

鐘鼓逼殘宵，千官趁早朝。
雲開中侍扇，日映上公貂。
調燮多臣稷，欽明有帝堯。
萬方咸貢獻，四海足權譟。

譚青

青字彥白，南豐人。建文元年鄉舉，性剛敏，卓犖不羈。知旌德縣，最擢工科給事，奉命江淮。旌德父老，詣闕請留，詔還任。調龍陽卒。

答孟端弟會朝卷

懷抱今宵盡，音書此地稀。
遙看雲樹外，孤雁向南飛。

胡廣

廣宇光大廬陵人建文二年進士廷對第一更名靖除翰林修撰靖難後直內閣復名廣累官文淵閣大學士卒贈少師禮部尙書謚文穆有晃菴扈從集

送江仲隆

十年清宦住京畿白髮蕭蕭老布衣鄉里交遊前輩在關河離別故人稀官橋細柳藏新雨水驛輕帆背夕暉我有愁懷何處遣秋來日望雁南飛

滕縣隨獵

隨獵入深山山深多乳虎虎見人來却負嵎人一向之觸而怒羣犬聞虎聲競趨至虎傍下口亂咋虎莫當犬視齧

虎如齧羊昔聞泰山麓有虎相馳逐尼父駐遊車下問婦人哭嗚呼安得此犬在當時盡驅猛虎食其肉

送周判官致仕

送別倒離樽春風白下門暖煙滋柳色新水上潮痕落日迴孤棹幽居憶舊村獨憐江浦月隨處照黃昏

春日扈從幸北京

曉隨仙仗出時巡聖主恩深四海春萬馬踏雲開輦路六龍扶日度天津陽和布澤初回暖別苑飛花不動塵豈是揚雄能獻賦空慙載筆列詞臣

楊白花

楊白花渡江竟不還非汝故來急恐落泥塗間春光憔悴

如花顏相思不見空長歎浮雲流水何漫漫安得隨風返
高樹仍結柔條莫飛去

高唐州與幼孜入榆林中避風沙漸行入夏津縣古
河屯遇一田家邀予二人飲意甚勤厚幼孜飲少僕
爲飲數杯上馬而去

策馬度榆林行次古河曲曲堤隱若城河流已不復下馬
飲河水逢人問鄉俗田家有好懷邀我坐茆屋爲言家登
萊分丁屯大陸居此成聚落歲久繁生育公家值少事衣
食恒自足所欣達官至開甕酒初熟呼婦滌金罍旋斲分
春醪馨香忽出戶浮蟻泛糟麴雖無肴與核羅案具蔬藪
野人性真率酬勸情轉篤殷勤慰渴飢餘以及童僕意氣

自豁然豈能令拘束興闌出門巷老少似徵逐相送河上
村徘徊佇延目

采石述懷

我生厭局促江海日奔馳扁舟薄暮過采石仙人招我登
峨眉峨眉亭前波浩渺百尺懸崖俯飛鳥三山潮到浪欲
平明月來時漾珠小錦袍公子李謫仙騎鯨一去經千年
作詩往有三百篇上追風雅相流傳却向此中看月色翻
身跳入龍宮眠纖塵不染骨已蛻空餘荒塚埋雲烟便呼
斗酒酌江水再起其乘墳下船將攜兩僮歌扣舷玉簫吹
斷催繁絃世上黃金不如土取醉何須斗十千悠然懷古
怨莫極留得青山舊相識傍人訝我酒家仙亦有從前好

詩癖夜闌慷慨曲未終起舞拂袖來江風朝雞促報東方
曙放手但覺金罍空君不見摩挲銅狄徒搔首今古英雄
歸一朽虛名落在宇宙間惟有文章可長久

寄簡夫

幾度詞垣對夕暉懷君千里恨相違乍逢故友將詩寄久
別文江覺夢稀牛渚波光天際遠龍河草色雨中微遙知
習靜東山下閒看浮雲出岫飛

送李輔歸鄉

都門曙色已曠曠相送離亭思萬重日下紅塵迷遠岫雲
邊紫閣度疎鐘家書欲寄雙鳬渚鄉夢先過五老峰同學
舊遊頻寄語別情應似宦情濃

別王子通

窗外蕭蕭竹萬竿酒醒聞雪夜深寒五更魂夢辭家遠幾
日風波去路難最恨長卿猶卧病祇憐貢禹浪彈冠明朝
不盡河梁意滿目雲山別後看

送人之官漢州

萬里迢迢蜀道行秋江遠水一帆輕楚臺去雁雲邊影在
峽啼猿月裡聲經學舊傳秦博士禮儀曾習魯諸生到時
倘見劉明府天上交游惜別情

題宋思陵書洛神賦

靜夜焚香閱舊書洛神下筆意何如可憐不寫平戎策千
古中興恨有餘

汴水園林跡已荒南來宮館燕錢塘卧薪有志圖恢復好
寫招魂酌岳王

吳溥

溥字德潤崇仁人建文二年試禮部第一授翰林
編修永樂初陞修撰遷國子司業清修苦節官二
十年不獲遷叙卒於位有古崖集

寄宋子環

聖恩寬逐客不遣過輪臺談笑潼關去雲霞仙掌開故鄉
深念汝遠道竟能來明日相思處高秋鴻雁廻

自歎

去鄉三十年顏貌總非昔昨日鄉人來相看不相識

悼外姪戴積善

遠樹千重暗江聲日夜哀終南山下路不見汝重來

題金華宗原常雙溪洗藥圖

洗藥臨溪頭水流溪尾香居人飲溪水百年躋壽康石路
曲盤蛇山花如錦黃日暮攜藥歸香風滿衣裳

捕魚圖歌

官河雨後春水渾夾河兩岸皆漁村捕魚但願魚課足風
波雖險寧復論大魚無多趣時賣小魚連船賤如芥大魚
賣錢須納官小魚得錢還酒債漁郎捕魚莫厭貧官河魚
米朝朝新勸郎莫厭漁業賤古來亦有非常人

送鄭指揮赴任

萬里來西蜀人稱蓋代雄指麾無失策談笑有奇功騎賜
龍媒駿衣裁獸錦紅逢人問兵甲百萬在胸中

秋興

力困謀非拙愁深鬢欲華一身今許國百歲任無家官柳
仍含翠秋槐半著花長吟聽疎雨清思繞天涯

挽胡敬方

白頭登貴日獨行冠羣英世誦伯夷傳人知司馬名顯揚
期令子紀述付諸生每說朱衣事令人恨不平

十二月二十四日宿呂梁洪是夕風雪大作賦此以
慰岑寂

洪河風雪浩漫天客裏逢春倍惘然白首爲郎過六郡憂

江右言卷 卷四 一
心報國願千年醉題詩草仍須改坐看燈花詎忍眠料得
閨中小兒女焚香日日卜歸船

岳陽樓圖

昔年會上岳陽樓高宴湖湘五月秋老去却從圖畫看故
人誰似舊風流

金幼孜

幼孜名善以字行新淦人建文二年進士授戶科
給事中成祖卽位改檢討累遷諭德從北征上重
其文學所過山川要害輒命記之仁宗初歷禮部
尙書大學士專典內制賜繩愆糾繆銀章卒贈少
保謚文靖有文靖集及北征集

九日讌集分韻得駛字

良辰不易得流光疾如駛我行忝扈蹕三時留帝里倏茲
屆重九朋從皆客子邀我開清讌烹羔膾鮮鯉時蔬間棗
栗羅列亦盈几紫萸汎新酒馨冽勝臘蟻喧呼熱中腸笑
談忘鄙俚酣歌引長劒光芒照秋水仰眎天宇寬商飈颯
然起候鴈屆新寒霜菊猶含蕊遙岑晚逾碧西山淨如洗
登高信非遠騁望增懸企幸茲會文飲勸酬助深喜羣公
爛詞藻清芬播蘭茝殷勤寫衷素抱拙慙蟲技

雨歎

入秋五六月風雨連夜朝屋漏水過膝路滑泥沒腰庭花
半憔悴田稼亦飄搖城中粟已貴城外無歸樵安得捲痴

雲太陽麗九霄使我開懷抱無復憂早朝

贈熊元節還南京

有序

友人熊元節始以大理卿奉命撫巡吳越諸郡三載之間鋤強植弱屏奸貪出冤滯威聲四達而吏民莫不悅服比還朝上嘉勞之特陞秩長南京憲臺恩渥之厚委任之專可謂極一時之榮者矣其還南京也來索予作詩遂賦古選三十韻以攄別

懷云

熊君負經術早歲登青雲素承明主知超擢中朝臣繼聞
陟大理奉命專諮詢風聲振吳越次第甦疲民鋤奸去
猾剗寬格頑嚚遂令東南郡皞皞被皇仁聖情日虛寧屢

勅嘉勞勩三載積憂懼馳情懸紫宸及茲奏對日款慰尤
諄諄申命職憲紀榮光動朝紳南臺旣專任委寄真殊倫
紉衣明白日清霜肅陽春豈惟戢貪墨實以繩謬愆况聞
澄清地表率出一身惟君秉直諒操履端且純屹然重時
望所至揚清芬蹇予忝朝列交誼夙所敦睽違渺南北夢
寐勞心神幸茲諧簪盍晤對逾兼旬忽聞別我去惻惻難
爲言驪駒發前路遙瞻勩芳塵衣冠擁廣陌絲管一何繁
握手且未辭盡此黃金尊人生會合間百歲若轉輪黽勉
圖報稱致身在君親永懷保終譽景仰希前聞廬陵多達
士至今耀斯文忠節著宇宙千載垂不泯勩哉踐古道永
矢期勿諉

爲王侍講時彥題秋意圖

長天帶遠景絕島含秋意
橋響客時過竹深門獨閉
蒼煙迴蕭瑟落日生迢遞
回首大江西故山何處是

北征晨起卽事

客居寡情惊兀坐不簪纓
侵晨見垂楚畏聞哀痛聲
士卒殊飢飽甘苦亦異情
盜剽非得已困迫深可矜
大將總戎鉞委託任匪輕
人命在朝夕胡爲輕死生

徽廟古松山鵲爲顧進士作

松梢盤翠出巖壑一夕山風吹子落
幾迴度澗聽松聲橫枝忽見飛來鵲
翠衿紅紫一何奇誤疑青鳥降瑤池
根深茯苓不易斲王母羽蓋今何之
宣和宮中迹如掃邊沙漠

漠天地老莫向松間聽鵲聲五國城荒長芳草

大若靈根爲醫者顧東啟作

吾聞永嘉朱孺子幼慕元真王道士採藥冥棲大若巖日
服丹砂學仙理時從絕嶺斫黃精餌之十年道不成偶來
谿邊見二犬奇形異狀心忽驚追蹤逐影何恍惚枸杞根
深下盤屈乃知此物鮮通靈採食應能致仙術斬根淨洗
清溪流寶鼎溫溫瑞氣浮煮來三夕火不絕味若崖蜜傾
金甌孺子飲之驚且悟便覺胃懷洒甘露清風兩腋肌膚
輕白日飛騰入雲去元真引領慕昇仙西陶山中自長年
山人往往尋蹤跡出沒隱顯隨風烟君家業醫今幾世活
人功多人感惠何用當年枸杞根滿林紅杏皆春意

送太守盧玉潤還新淦展墓

薊門十月多北風道上垂楊枝已空離筵呼酒勸行客酒杯有盡情無窮盧君自是同鄉里况復青雲托知己選部曾推藻鑑明朝端共說才華美一朝承擢守錢塘朱幡皂蓋生輝光布宣德化耐繁劇撫字黎庶多慈良是邦從昔稱難治閭井欣欣樂君至數邑豪奢自歛蹤海濱赤子無遺利政成九載復朝天喜得論心向日邊九重奏績榮書最萬里承恩顰賦還匆匆話別臨長道昨日紅顏總衰老風前鴈影去人遙馬上狐裘覺寒早南去歸舟莫太遲梅開定是到家時鄉中故舊歡迎處應歎昔遊今若斯歸榮畫錦誠堪羨桑梓情深難久戀明年八月候趨朝五雲深

處重相見

福祿獸歌

狀似驢

有獸有獸名福祿逸態奇姿異凡畜身高五尺力如虎一日千里超驥足奇文間錯分黑白毛質無瑕瑩如玉目光瞳朧夾明鏡掩映元雲散朝旭紛紛縞毳雪花寒皓彩瑤光何煜煜超騰迥覺長風生一鳴解使白獸服海南之國卜刺哇乃有此獸出大麓虞人致之匪羈繼弗迫弗驅自馴伏萬里飛航度海來天吳海若相參逐山川處處流光彩祥烟瑞靄飄芬馥清晨導引獻九重從以元犀與神鹿乃知聖德被廣遠航海梯山日相屬遠人稽首貢方物異瑞奇祥莫殫錄騶虞麒麟在靈囿渥洼龍媒聚天育願將

職貢寫成圖一統河山集諸福吾皇萬壽與天齊聖德神功昭簡牘

秋日登萬歲山

萬歲之山高插天遠摩蒼翠凌紫烟瓊樓玉宇耀初日碧
窻朱戶相輝鮮春風瑤草長新綠珊瑚玉樹何娟娟鶯啼
白盡出深谷縞鶴歲久巢松巖洞門陰陰苔蘚碧石澗九
曲通流泉日轉金輿經翠巘風迴仙仗度花前天香遙散
廣寒外紫翠近落瑤池邊方壺員嶠果安在聞風瑤圃徒
虛傳偶來登覽上絕頂便欲振袂凌飛仙坐閱天地長不
老上下日月同周旋

次鄒侍講夜坐卽事

掩卷坐清宵。圍爐擁敝貂。捲簾寒易入。汲水凍難消。人靜
傳疎漏。庭虛度急飈。夜闌瞻北斗。天路正迢迢。

追和學士胡公秋日同陪駕重遊太液池

遠水含秋色。飛霞映晚天。折荷驚白鷺。倚樹聽元蟬。翠合
三山近。波涵一鏡圓。子雲才更好。獨步賦甘泉。

馳道平如掌。金輿向日移。畫橋低樹影。粉檻壓花枝。展席
鷗相近。迴鞭鶴未知。故人詩句好。盡得寫清奇。

冬日扈駕獵龍山同尙書蹇公學士胡公登斗首山
佛窟寺偶成

空寂渾無事。從來遠俗氛。厓深留凍雪。松老駐寒雲。碧殿
香煙靜。層雲紫翠分。下方塵擾擾。鐘磬有誰聞。

野曠澹朝暉山光拂翠微青松低石屋黃葉礙柴扉長日
僧閒卧終年客到稀自緣塵俗少甘與世人違

姚廣孝少師自穹窿山中移茶種植靈谷寺旣自爲
序復來求題

異種穹窿產移栽自昔年發生宜土壤潤澤近山泉品出
武夷上香分穀雨前誰能識滋味爲問趙州禪

贈人遊錢塘

錢塘古名勝念子事遠遊湖山迎畫舫海月映紅樓錦樹
千堤曉銀濤八月秋幾時逢賀監一笑解吳鉤

早發興和

未曉戒嚴程鳴弓度塞城川雲隨地起野火雜星明虎旅

聽笳動鑿旗傍蹕行
草清沙路軟渾覺馬蹄輕

喜友人郭子成赴召至京夜宿旅舍賦此奉東

睽離已是五年餘
又復相逢在客居
白首誰憐多患難
丹心自許效馳驅
金臺夜月生歸夢
鯨水秋風憶故廬
此夕旅懷應盡解
不須對酒重欷歔

寄伯兄季質及諸弟

金臺爲客動經年
北望鄉山萬里天
書札久無朋舊問
官居惟有老親憐
白雲渺渺西江外
歸鴈翩翩落日邊
早晚淦頭逢驛使
殷勤爲我寄長篇

雲山草堂爲楊庶子賦

聞道幽居近翠微
好山多與白雲齊
柳塘日煖花爭發
門

巷春深鳥自啼酒醒每臨松下坐詩成閒向竹邊題一從
射策金門去風雨年年夢建溪

次祭酒胡公移居禁城之西韻

小徑新開長土花數椽茅屋靜無譁
聽前午轉聞啼鳥墻角晴來數鬪螭
一榻安身那有累十年爲客自成家
詞林退食無餘事日日相過問煮茶

輓解湖夫

憶昨承恩乞養歸九原一去更無期
弟兄遘難人皆惜鄉里傷心我更悲
令子已聞歸舊業故人還爲著銘詞
追思往事成塵夢回首山陽淚滿頰

豸角山房詩

并序

予友羅彥功昔司教於延平之順昌因扁其退休之室曰豸角山房嘗命善畫者爲圖以寫其山房之勝而徵士大夫爲之歌詠焉比來京師出此卷相示且索予賦詩憶予十七八在廬陵時與彥功相交今且三十餘年矣俯仰今昔不覺爲之慨然因退朝之隙與彥功張燈夜話遂投筆賦此

時承樂戊

戊八月二十又六夕也

昔年振鐸豸山阿池館陰陰闕綠蘿雨後翠微移榻近春來芳草入簾多
搥衣秀士聽經退載酒騷人問字過江海只今思舊業夢魂長繞鄒津波

賦赤壁贈蕭長史用導之靖江

大江東去碧溶溶水淨平沙接遠空月下勝遊非舊日眼中遺迹感英雄
猿啼斷岸孤帆雨鶴唳滄洲一笛風料想登臨無限意題詩還憶訪坡翁

贈別友人羅汝宏

久別故人心欲摧燈前對語謾啣杯嚴親慰問勞書札令弟交游數往來
行李欲隨孤棹發趨朝又逐五門開相思莫忘金陵路還寄來時過鳳臺

送僧歸崑山

旃檀樓閣倚中天借住僧房又隔年方外幾時堪結社名山到處可棲禪
曉攜金錫雲生鉢夜對龕燈月滿船我憶遠公能說偈臨風謾爲寫長箋

偶興

疎雨過梧桐商飈動楊柳秋意已颯然殘暑詎能久

張古老騎牛圖

客有騎牛者人稱古老仙問之欲何往大笑指青天

寫懷錄寄諸兄弟

慈親日夜係深思夢裏常懷見面遲近得好音相慰藉爲
言強健勝前時

題王熙臨宣和雪天蘆雁

端本堂中迹已空興亡總在畫圖中惟有幹離河上路年
年飛雪送歸鴻

秋江待渡圖爲席咸寧賦

秋山疊疊映雲蘿渺渺長空接遠波日暮小舟爭渡急行人猶唱竹枝歌

萬松圖題寄幼學賢弟

一別鄉園廿四春種來松樹已成村寄言孫子須培植剪伐無令及本根

晚出長安門偶成

白髮氍毹老從官籃輿自便懶登鞍京華久住交遊少惟有西山耐久看

題畫扇寫金陵送別

楊柳深深映畫樓君行又上木蘭舟夜深正好看明月莫放青山過石頭

劉端

端字季莊南昌人建文二年進士歷大理寺丞奉
勅撫安兩廣比還內難已靖成祖命治方孝孺獄
端抱建文勅上殿慟哭言舊君何在臣不忍殺忠
良願與同日死忤旨坐削刑卒臨刑賦詩聞者悲
而壯之隆慶初詔祀大節祠

臨刑詩

舊主今何在深慚報國遲幸全忠孝節對此亂離時九鼎
奸雄問微生白璧知綱常千古事此日屬銘彝

石彥誠

彥誠字誠之寧州人建文二年進士授武義縣丞

有惠政召修永樂大典書成爲廣東徐聞令楊溥薦之朝將大用徵未及而卒

旌陽山

山色青青水色蒼百花開盡蕙蘭香旌陽屹立閑迎送看盡行人歲月忙

朱紘

紘字文冕初名塔字梯雲南豐人少聰敏博稽子史孝友端謹爲鄉里所重建文二年進士永樂時官編修有仕優稿

丹霞卽事

乘秋入此山又及春光亮木葉雖孤寒氣至神終暢坐并

亦時芳爲我深山餉霽遊谷與源魚鳥識意嚮碧草媚幽
情同心結竒况雨勢壓雲根閉戶自高倡靜時性命閒動
時天地曠石壑疊竹雲飛雲依壁障謫居天之下低徊地
之上澹泊生容與簡默成逸宕謂盛必致危謂高必致亢
所以古幽人往往學遊放灌園欣瓜肥聽鳥愛神王課春
作晨炊種秫爲冬釀阡陌閒往來軒冕俱塵妄乾坤虛以
澄日月寧空盪祇期道氣盈四海長無恙

楊士奇

士奇名寓以字行泰和人建文時以辟召入翰林
永樂初改編修入直文淵閣累官少師華蓋殿大
學士贈太師諡文貞有沙羨石臺東里諸集

送尤文度歸吳中

我友整遐裝暫將起旋歸平明發城邑率彼東路馳爰與
二三子祖餞臨郊岐中觴趣分袂恨恨使我悲嚶鳴求其
友竊慕伐木詩平生攜手好何爲中訛離行當阻川岫安
得睹光儀情敦思苦深久要諒不遺各言崇令德庶保黃
髮期

漢江夜泛

汎舟入元夜奄忽越江干員景頽西林列宿粲以籛凝霜
飛水裔回颺蕩微瀾孤鴻從北來哀鳴出雲間時遷物屢
變游子殊未還短褐不掩脰歲暮多苦寒悠悠念行邁慊
慊懷所歡豈不固時命苦辛誠獨難感彼式微詩喟然興

長嘆

同蔡尚遠尤文度朱仲禮楊仲舉蔡用嚴游東山

步出城東門逍遙望雲嶽累月懷佳遊茲晨遂登踐梵宇
繞層阿飛樓凌絕峴方塘涵湛碧喬林茂敷衍繁翳幽莫
通丰茸紛不剪攀磴窮高躋緣逕屢回轉是時微雨收輕
霞澹舒卷睇遙素橫川俯夷綠盈畎陟降體自便顧盼心
已緬况接曠士言復偶釋子辯析空理弗昧違喧抱逾展
何因此閒棲永令浮慮遣

永豐曾氏龍潭

開軒面澄潭潭水綠於染其下蟠蛟蚪四時興有泝嘉樹
羅蔥蒨煙霞互舒歛晴漪漾春牖涼颼含暑簟俗轍謝經

過書卷恒不掩探微心有得行素道無歎消搖視天宇油
雲池冉冉廢跂沂上樂誰當歎與點

題劉逸人樂耕卷

理生雖異業居世皆有務治本旣在茲食力余所慕九扈
春始鳴興言向田墅初來正溝塍爰方藝禾黍雖有耘耨
勞三時足甘雨歲功聿已成屢豐報田祖儲峙何必多取
具充寒暑有酒可同歡時時會鄰父旣醉去悠然登高睇
平楚一爲擊壤謠游心納千古

雨中寄鄒仲熙

炎月苦滂雨抱疾坐幽居淖泥橫隘巷流潦溢深渠已絕
還往迹遂將人事疎時聞黃鳥鳴交交屋東澗豈無斗酒

酌開玩古人書興懷在君子夙昔同歡娛契誼託金蘭清
德重璠璣跬步不可卽而况千里餘仰瞻白日暉屏翳何
由舒念離余未弭單居子何如

雜詩三首贈陸伯陽

中夜不能寐攬衣步前楹員靈肅清穆涼風颯以興秋蟲
亦何悲流響於階庭徘徊感節變縣縣憂思生四時擲人
去忽如流電驚立身庶及時黽勉苦無成竊愁盛年邁將
與秋草并念之不得言俛默傷我情

翩翩孤鴻雁遙遙鳴且飛寒陰翳洲渚日暮將安歸棲棲
客遊子獨往臨路歧薇食聊自甘卒歲仍無衣達士守固
窮遑恤寒與飢先民有遺言樂命復奚疑

南國有佳人皎皎懷芬芳被服紈與綺五色何煌煌容儀
希世有音響流四方我懷往從之晨征越河梁嘉遇誠獨
難歡愛兩相當願得常攜手終歲不相忘

遇山居老人有感

細柳鮮桃漱澗春白雲流水淨無塵看渠鶴髮林居者只
傍青山老此身

著處溪山可置身古人求志不求聞從來未有匡時術只
合攜家傍白雲

夜發清江口

日落烟水寒解纜清江渚中夜北風來相送潭州去

過谷亭

明月轉橫竿露下孤篷濕欲繫谷亭舟沙頭風正急

夾溝遇邑人

聞道故鄉來辭家今遠近恐有南京書停舟試相問

題鄂渚贈別

鸚鵡江中紅樹鳳皇城裏青山借問來游幾日秋水蘭舟

獨遲

三十六灣

湘陰縣南江水斜春來兩岸無人家深林日午鳥啼歇開
遍滿山紅白花

齋宿聽周編修彈琴

羣處諒有適單居恒鮮歡樂只衆君子齋沐此盤桓華鉅

照綺席香氣藹焚蘭爰理嶧陽桐爲我三四彈遲遲寫商
意宛宛含幽歎怡我中和抱滌我沈鬱端所懷在古操焉
知清夜闌

過城陵磯

城頭水落石層層石上魚檣半搭簷忽望高樓出城郭舟
人指點說巴陵

送黃叔昭歸文江

賜歸初買上江船歸路何因復愴然渡海幾人還故里到
家三月及春田碧梧邱隴回生色綠水園林捲宿煙莫歎
物情非夙昔青山還映一門前

秦伯川席上作

飛雪初停酒未消溪山深處踏瓊瑤不嫌寒氣侵人骨貪
看梅花過野橋

雪中飲陸伴讀斗室

新齋坐閒敞瑞雪晃清妍寒消碧牕外光動玉琴前淹留
酌甘醴則咏瑤華篇自然紛慮靜卽此對羣仙

送況伯律復任蘇州

還捧天書辭玉陛雙旌五馬去悠悠十年不愧趙清獻七
縣重迎張益州楊柳翠迷湖上寺杏花紅映水濱樓到官
正是勸農日郊郭歌謠擁道周

楊白花

楊白花逐風起含霜弄雪太輕盈蕩日搖春無定止樓中

美人雙翠輦坐見紛紛渡江水天長水闊花渺茫一曲悲歌思千里

巫山高

巫山高高十二峯連崖疊巘如游龍當時陽臺下神女翠斂紅銷空處所朝朝峽裏望氛氲可憐猶似作行雲相思已下霜裳淚況復猿聲不可聞

寄尤文度

苦憶尤參議投簪養病勞卑栖人總厭閒散自能高厨邦胡奴米門深仲蔚蒿平生冰雪意猶足重吾曹

聞角

風靜周廬夕營門角起愁不須三弄徹對月淚先流楊柳

飄還合梅花落未休鄉心已無限況復在邊州

題陳叔起畫

青山帶長林虛亭簷蕭爽溪水流玉虹天光涵滉瀟潏潏
淹滄遊塞芳悵幽賞惟有同心人扁舟日迴往

送胡元節廣西憲使

驄馬赤韁臨歧嘶未休朝廷用儒雅風紀得才猷天遠
三湘外霜含八桂秋貪漁嗟薄俗表率在名流

晚同宗豫少保自孫莊先行詣清河途中奉寄勉仁
少傅宏濟太常

載書先發赴前營雨浥飛埃晚更晴人喜望家三舍近馬
知歸路四蹄輕風飄點點溪花送日射行行野樹明却憶

今宵鵲帳底翠壺紅燭伴雙清

送向武全吏目

一命微官萬里程清時行送魯諸生天連粵嶠孤城險家
渡湘江數口輕楊柳飛花沾去棹桡柳襍樹隱離情才高
莫歎淹遲僻政滿還來謁聖明

鄧州城下夜雨

薄暮風色寒移舟宿前渚欹枕不成眠孤篷夜來雨

江南行

家住橫塘口船開去漸遙歸時不愁暮出浦正乘潮
偶來長浦裏相伴采蓮歸並船打雨漿濺水濕羅衣

古意答伯陽

河洲雙鴛鴦流蕩還相逐皎皎白楊花
風吹不相續

發淮安

岸蓼疎紅水荇青茨菰花白小如萍
雙鬟短袖慙人見背立船頭自采菱

任邱道中

霜柳未全稀風沙不住飛
居人過驛盡獵火隔河微
客路衝寒景天恩戀禁闈
金臺行漸遠回首思依依

入薊州界

雲淨天清紫翠浮好山消盡越鄉愁
行人如有江南興馬上題詩入薊州

宣德丙午謁二陵

去年侍從謁長陵
此日重來慟倍增
春柳春花渾似昔
陵樹復層層

君恩追憶不勝哀
老淚乾枯病骨摧
陵下一來腸一斷
餘生知復幾迴來

清明有感

西江南望渺天涯
歲歲清明不在家
蕩日飄風無定著
亂人情思是楊花

題少保楊滄菴江鄉歸趣圖

巴陵西畔楚江分
曾泛湖波望嶽雲
借得君山小龍笛
吹向洞庭君

江上早行

漢陽磯上鼓初稀
烟柳矐矐一鵲飛
乘月不知行處遠
滿江風露濕人衣

李縣丞之官臨臯

少年間巷共嬉遊
邂逅京華總白頭
奉使曾持巴郡檄
之官仍買潞河舟
嶺南翠霧含津樹
海上紅霞映縣樓
懷抱公餘清似水
題詩還憶寄中州

滕王閣送別

章江西來繞洪州
滕王高閣臨江流
滕王去後無千歲
高閣人間幾興廢
昔聞貞觀全盛時
大廷金冊封宗支
時平還出領旌節
富貴非常驕逸滋
正對西山俯南浦
雕闌朱檻參差起
玳筵鳳管雜龍笙
白晝歡聲彩雲裏
留連晚日

下簾鉤別有漁歌聞上頭回眸共盼滄洲際杏彩蘭嬌擁
蛾翠只言歡樂殊未央城頭一夜飛秋霜三春榮盛逐流
水佩玉鳴鑾俱渺茫年深代易無此閣好事何人爲重作
絕世留傳蛺蝶圖東風粉色皆銷落只今閣空臺亦平瀕
江但有滕王亭松門薄暮掩修竹數葉蕭蕭寒雨青當時
棄德耽遊宴身後荒涼竟誰歎一種南昌孺子亭行人下
馬思東漢君行幾日過江津弔覽應知作賦新文章自昔
三王盛還見今人繼昔人

夏夜用謝宣城韻答陸伯陽

連柝起高城微鐘飄廣陌徘徊夏夜長懷人未眠客林風
有餘清庭月流虛白結思渺城南如何遠促席

君馬黃

君馬黃我馬白並出青樓東俱馳綠楊陌陌頭春日遊人
多復恐紅塵暗玉珂長安大道淨如洗回轡聯翩若流水
一雙意氣逼青春共指天門五雲裏男兒高步會成名何
須一日千里行

晚次景州遇李頎給事呂文質進士

下馬郭西村蕭條盡掩門荒城明落景獨樹出平原野水
條侯墓寒蕪董氏園閒因訪遺事邂逅故人論

重過濟寧

閭井皆臨牖郊原四望平橫峯連岱轡分水向彭城笳鼓
屯千騎舟車會兩京沿洄未能住俱是重王程

紅心驛

馬頭近見紅心驛茅屋參差半酒家
瀟酒赤欄橋外柳西風吹折數枝斜

薊州道中見菊花有懷諸君子

秋光漸近重陽節緩轡垂鞭踏軟莎
却憶玉堂閒白晝誰家庭館看黃花

想見聯鑣西出坡酒壺詩卷共高情
看山騎馬漁陽郭也似平坡寺裏行

查雋

雋字元凱寧州人受學同里程翼永樂初鄉舉至
京師以日南歸遂號歸樵營郭西別墅以居有歸

樵集

正村偶興

夜宿荒村古渡邊
水聲聒聒不成眠
螢光隔竹幾家屋
櫓響出林何處船
龍石巖前風細細
馬蹄潭上月娟娟
故廬不遠明朝到
脫却霜裘當酒錢

習韶

韶字尙鏞號虛庵
永豐人永樂初官長樂知縣歷
兵部郎中

寄章詰歌

章公子冰壺水
世上英雄可相許
閉門讀盡人間書
一片襟懷五湖雨
前年正馬渡嶺南
寒風吹鬢寒蓁蓁
手抱美

人狂欲舞荔枝花外扶春酣是時我亦沉羈旅鐵笛風吹
心自譜豪來喚起五羊仙大笑寧知隔今古章公子冰壺
水君當爲我生我當爲君死世上知心復能幾長風昨夜
吹茅屋吳楚天高怨黃鵠却促青錢買片雲虎瞰泉頭噉
秋菊

寄雲岑山人章詰

虎瞰桃花雨白頭何處吟病添憂世慮老送卧雲心墨沼
生寒蒼苔鼎落晚陰冰霜終自潔天地有知音
二月禺山雨白頭何處吟離亭津樹合別路楚山深老淚
不盈睫鄉愁空滿襟扁舟逐鷗鳥應識去來心

懷雲岑山人

一瓢獨飲松崖水昨夜秋風髮鬢寒
小鳥熟知狂客態野人猶愛舊儒冠
深居自信棲遲久直道從知出處難
我有新詩三百首小窓燈火待君看

白頭歸卧買輕舸碧漢寥寥一羽毛
念我皂囊爲客久看君文藻向人高
飽尊夜雨歌黃鵠繡枕春風夢碧桃
薄宦白甘生計拙新寒還著去年袍

一章 詰

詰字子愚號雲岑山人新喻人穎七世孫梁石門
門人博學工詩絕意仕進著有南閩山稿擊壤遺
音江湖漁唱集

寄永豐習韶

每懷長樂宰一別五星周令德世間少清風池上留東臯
秋樹晚南國暮雲浮尊酒論文夜迢迢不易求
長嘯空巖叟蕭條生意疎白頭淹筆硯青眼賴妻孥竹邇
隨風掃蔬畦帶月鋤相知惟習老音問數年無

送歐陽宰

三年不見楚郎官此去應衰獬豸冠文采每懷唐戴胃政
聲不減漢劉寬驂騑春健隨嘯輦沉瀝秋高瀉玉盤知爾
承恩歷金馬嗟予卧病老江干

紫嶺深藏一草亭亂峯高下看雲生洞中龍起山腰雨樹
杪鶯啼谷口晴畫引隣翁尋野竹晚隨稚子濯塵纓何人
爲著萊公傳書作潛夫第二名

寄永豐習韶尚鋪

舟行到處一思君
白水青山每憶神
瘴雨夜添孤客淚
春風曉送獨歸人
百年心事頭俱白
三載交情夢亦親
莫忘五羊城下路
幾回攜手踏車塵

黎 慎

慎字充輝清江人
童子時爲詩輒有奇語
長從梁石門遊博通羣籍
落魄不羈永樂初應明經召至
京授職不就歸

蒙山

飛峯起中天
凌雲疊連嶠
征驂駐其嶺
遐眺入冥漠
巖泉煙際瀉
崖石空中削
天風送黃鵠
長飛向寥廓
盤盤青天

江西詩徵

卷四十六

明八

三

外厚地何磅礴丈夫四方志天地安所托仗劍歌遠遊徒
御總錯愕結想涉崑崙煙霞正綿邈

一吳

均鈞一作

均號吟峰新喻人永樂初舉人材科官中允

施原卿隱居

米家山水郭熙筆寫得高人原上居三徑露花秋冷淡一
川雲氣曉紆徐鸛夷泛處常同客舴艋移來好載書却憶
小山招隱賦臨風撫卷意何如

題陳公望三山書閣

三山渺何許乃在淪川曲天柱列屏圍虎瞰蔚蒼綠中有
力學士於焉結書屋度閣貯圖書床几薦琴筑視滴泉溜

分燈吹燐火續神仙非所學且企聖賢躅

左一謙

謙字彥彰南城人永樂中以子璫貴贈布政司右叅議

遊麻姑

自分一澤癰棲遲第三谷間遊麻姑山佳境豁心目中天
削芙蓉垂地瀉飛瀑虹橋跨靈湫迢迢樓觀矗星杉雖已
陳松筠自寒綠香風吹碧蓮微雨洒黃菊安得學仙侶相
與事辟穀緬懷方平翁顏碑良可讀

周 昉

昉字原亮新城人

寄楊子東

錢塘舊友知誰在萬里滇南見子東
夜市鬪茶涼雨後晴湖載酒夕陽中
龍梭織錦翻新樣風繡縈絲記舊工
不是吾儕不歸去六橋行處草茸茸

寄素軒公

行馬縱橫禁喝時不干聲色尙文辭
深藏結綠千金劍少試抽黃七字詩
聚遠有樓堪縱目在官無事且開眉
欲知王謝人家樂霽月光風藹墨池

江西詩徵卷四十六